

Pa facilita fluho di turista pariba

15 tour bus lo haya permiso pa core exclusivamente pa San Nicolas



ORANJESTAD – Ayera mainta den cuadro di e lansamento di e proyecto Aruba Mural Projects (AMP), minister di Turismo sr. Otmar Oduber a informa riba desaroyo di diferente proyecto cu nan lo ehecuta pa San Nicolas lo bira e di dos capital turistico di Aruba.

E proyectonan aki no tin di haber unicamente cu infraestructura, rescate di monumentonan arkitektonico, museonan, actividad cultural manera Carubian Festival, sino tambe cu arte y embeyecemento di San Nicolas. Un di nan ta e proyecto Aruba Mural Projects cu lo duna colorido na San Nicolas y lo stimula arte na San Nicolas. Intencion tras di e proyectonan aki ta di crea e “atraccion necesario pa turistan cu ta bin na nos isla por tin un motibo pa bini pariba di nos isla”, segun minister Oduber.

Proyectonan

E mandatario a anuncia cu diaranson venidero lo wordo firma e acuerdo di renobacion di San Nicolas Store cu lo dreña den e fase di renobacion di 7 luna cuminsando luna di augustus venidero. E destinacion di e joya monumental aki lo ta un museo ultramoderno. Igualmente na fin di november e proyecto



pa Watertoren San Nicolas lo bira un museo di utilidad. Tambe DOW a publica e destaho publico relaciona cu e prome fase di e proyecto di mehoracion di infraestructura cu ta core desde Warda di Polis San Nicolas, full Promenade te na e rotonde di San Nicolas Store y edificio di DOOV.

Tur e area aki lo haya un metamorfosis pa e bira mucho mas agradabel pa turistan y nos hendenan local. E minister a anuncia cu tin un grupo di mas cu cinco inversionistan cu ta cumprando edificio of cu nan ta doño di edificionan cu nan lo bay renoba nan.

El a bisa cu gobierno tambe ta carga su responsabilidad di renoba edificio di Uncle Luis Store, caminda e monu-

mento aki cu lo bira e sede di departamento di Cultura, pa e prome semester di 2016. Tambe e edificio geel na altura di ex Promenade lo wordo transforma den un tipo di un area di tayer pa artistanan local cu tin un seyo aki na Aruba. Nan lo wordo subsidia pa traha nan arte den aire liber dilanti e turistanan.

Permiso autobus

E mandatario bisa cu e objetivo aki no ta un tarea facil den cual nan a studia, mira y busca den henter e maneho integra di cultura y turismo e proyectonan cu nan lo bay ehecuta pa crea fluho di bishitantenan pa bin pariba di nos isla. Un facilidadnan lo ta e dunamento di permiso pa tour bus lo por brinda e servicio exclusivo di Playa pa San Nicolas. Nan ta 15 tour bus cu tur dia lo sali di waf na Oranjestad of for di hotelnan cu direccion San Nicolas. Nan lo percura pa lo tin fluho di hende cu continuamente ta bin pariba.

Tin un moratorio pa loke ta trata e diferente permiso riba transporte publico. Pero e mandatario a informa cu nan a incorpora 15 permiso den esaki cu ta carga e permiso di e ruta exclusivamente pa San Nicolas.

Aruba Mural Projects

E mandatario a cualifica e lansamento di e proyecto di

Aruba Mural Projects como un momento hopi special, despues cu pa casi 2 aña y mey nan a prepara diferente proyectonan cu e envolvimiento di diferente partner di e industria principal di nos pais pa haci posibel cu San Nicolas lo por bira un ciudad cu un gran atractivo turistico.

Tambe e mandatario a laga sa cu e construccion di Bahia Principe lo duna un empuhe enorme na nos economia. Diamars ultimo nan a delibera riba diferente contesta di e diferente preguntanan cu tabata habri ainda rond di e proyecto aki.

Nan a manda un carta firma pa cuater minister pa e responsabel di e proyecto Bahia Principe. Minister Oduber a indica cu nan ta den e proceso final caminda DOW ta studia e mapanan di e proyecto aki. Ya e diseño preliminar di e proyecto a wordo acepta. Tabatin un cambio riba e parti comercial cu ta bin adunto cu e hotel. Nan a haci e cambio caba y tur cos ta muestra cu den principio esaki ta aproba, segun e mandatario.

Awor nan lo bin cu e proceso di e plannan definitivo y demas detaye. Tambe e parti di e MER rapport cu nan a traha lo conoce algun cambio cu mester wordo adapta. Tur cos ta muestra –segun minister Oduber– cu prome cu fin di aña e construccion di Bahia Principe lo inicia. □